

Staðfesting konungs á skipulagsskrá fyrir „Forlagsboghandler Dr. phil. h. c. Ejnar Munksgaards Stiftelse til Fordel for Det filosofiske Fakultet ved Islands Universitet i Reykjavík“, útgefin á venjulegan hátt að mandatum af dóms- og kirkjumálaráðherra 28. september 1938.

Skipulagsskráin er þannig:

Skipulagsskrá

fyrir Forlagsboghandler Dr. phil. h. c. Ejnar Munksgaards Stiftelse til Fordel for Det filosofiske Fakultet ved Islands Universitet i Reykjavík.

1. gr.

Sjóðurinn skal bera heitið „Forlagsboghandler Dr. phil. h. c. Ejnar Munksgaards Stiftelse til Fordel for det filosofiske Fakultet ved Islands Universitet i Reykjavík“.

2. gr.

Pegar sjóðurinn er stofnaður eru eignir hans krónur 10.000,00, og skal fyrir höfuðstólinn kaupa dönsk skuldabréf, er á hverjum tíma er heimilt að nota til ávöxtunar ómyndugra fjár.

Eignir sjóðsins skulu hljóða á nafn sjóðsins, og skal eftir því sem við verður komið vera skráð á þær, að þær séu hans eign, og skal auk þess á þær skráð viðeigandi afhendingarbann.

3. gr.

Skuldabréfaeign stofnunarinnar skal fyrir milligöngu sendiherra Íslands í Kaupmannahöfn vera komið fyrir í umboðsdeild „Bikuben“, og skal hún hafa umsjón hennar.

Ársvextina skal greiða rektor háskóla Íslands, og skal þeim varið svo sem í 5. gr. segir.

4. gr.

Vöxtum sjóðsins skal ráðstafað af nefnd þriggja háskólakennara í íslenskri tungu og bókmenntum og sögu við heimspekisdeild háskólans í Reykjavík. Nefndin skal kosin af deildinni ásamt rektor háskólans. Kosning fer fram þriðja hvert ár.

Endurkosning er heimil.

5. gr.

Nefnd sú, er ræðir í 4. gr., skal árlega mega ráðstafa 9/10 vaxtaupphæðar þeirrar, sem umboðsdeild „Bikuben“ hefir greitt rektor háskólans.

Höfuðstól sjóðsins má aldrei skerða.

Tíundi hluti sá, sem eftir er, leggst við höfuðstólinn, og skal með hann farið samkvæmt reglunum í 1. og 2. málsgrein 2. greinar, en þó aðeins þar til höfuðstóllinn alls er orðinn krónur 100.000,00, en eftir það má greiða út alla vaxtaupphæðina.

Nú eru skuldabréf, sem eru eign sjóðsins, dregin út til greiðslu, og skal þá andvirði þeirra varið eins og segir í 2. gr.

Sama gildir um sérhverja aukningu á eignum sjóðsins, og skal slík aukning skráð á skipulagsskrána.

6. gr.

Er úthluta skal vaxtaupphæðinni, sker nefnd sú, er um ræðir í 4. gr., úr því, hvort hana skuli hljóta einn eða fleiri styrkþegar.

Upphæðinni skal einkanlega varið til þess að vinna úr eða gefa út forníslensk rit í útgáfum, sem hafa alþjóðlegt gildi, eða til þess að vinna úr eða gefa út rit um þessi efni (rannsóknir íslenskra fornmennta) eða til ferðastyrkja handa íslenskum fræðimönnum eða stúdentum til málfræðilegra, bókmenntalegra eða sagnfræðilegra rannsókna í dönskum söfnum.

7. gr.

Styrkþegi hlýtur styrkinn sem séreign, og eigi má framselja hann eða veðsetja, eigi má heldur kyrsetja hann eða gera í honum fjárnám eða aðra aðfarargerð.

8. gr.

Ekki má gera rétt til styrks úr sjóðnum að dómstólamáli, heldur sker nefnd sú, er um ræðir í 4. gr., úr því, og er það fullnaðarúrskurður.

9. gr.

Á hverju ári skal „Bikuben“ gera reikningsskil fyrir eignum sjóðsins.

Nefndin gerir einnig á hverju ári reikningsskil um það, hvernig vaxtaupphæðinni hefir verið varið og úthlutað.

Reikningsárið er almanaksárið.

Áður en 3 mánuðir séu liðnir frá því að almanaksárið er útrunnið, skulu reikningar þessir fengnir í hendur endurskoðunarnefnd, sem gengur úr skugga um, að eignirnar séu til og úrskurðar reikningana.

Í endurskoðunarnefndinni eru 2 menn, og skal annar þeirra vera sá maður, sem á hverjum tíma er sendiherra Íslands í Kaupmannahöfn. Hinn nefndarmaðurinn skal kosinn, og gerir bókaútgefandi Einar Munksgaard það, meðan hann lifir. Að sjóðsstofnanda látnum skal hinn maðurinn kosinn af nefnd þeirri, er um ræðir í 4. gr. Sá maður endurskoðunarnefndarinnar, sem kosinn er, skal kosinn til 3 ára í senn. Heimil er endurkosning.

10. gr.

Skyldi svo fara, að heimspekideild Háskóla Íslands hætti störfum, eru framangreindar reglur í gildi eftir sem áður - þó svo, að vaxtaupphæðir, sem enn ekki hefir verið úthlutað, skulu afhentar stjórnarnefnd Árna Magnússonar sjóðsins við háskóla Kaupmannahafnar, og kemur stjórnarnefnd sú í stað nefndar þeirrar, sem um ræðir í 4. gr.

Reglur þær, sem getur í 2. málsg. 3. gr. eru í gildi eftir sem áður, þó svo að formaður stjórnarnefndarinnar kemur í stað rektors við háskóla Íslands.

Ef svo kynni að fara, koma danskir vísindamenn til greina við styrkveitingu úr sjóðnum til jafns við íslenska, með skilyrðum þeim, sem tiltekin eru í 6. gr.

Kaupmannahöfn, hinn 23. maí 1938.

Einar Munksgaard.